

verlossing is nou nader by ons as toe ons gelowig geword het. 12 Die nag het ver gevorder en dit is amper dag. Laat ons dan die werke van die duisternis aflê en die wapens van die lig aangord. 13 Laat ons welvoelig wandel soos in die dag, nie in brassery en dronkenskap, nie in ontug en ongebondenheid, nie in twis en nydigheid nie. 14 Maar beklee julle met die Meester, Yahshua die Messias, en maak geen voorsorg vir die vlees om sy begeerlikhede te bevredig nie.

Romeine 14:1 En neem hom aan wat swak is in die geloof, nie om oor sy gevoelens te oordeel nie. 2 Die een glo dat 'n mens alles mag eet, maar hy wat swak is, eet groente. 3 Hy wat eet, moet hom wat nie eet, nie verag nie; en hy wat nie eet, moet hom wat eet, nie oordeel nie, want Elohiem het hom aangeneem. 4 Wie is jy wat die huiskneg van 'n ander oordeel? Hy staan of val met betrekking tot sy eie meester; maar hy sal staande bly, want Yahweh is magtig om hom staande te hou. 5 Die een ag die een dag bo die ander, die ander ag al die dae gelyk. Laat elkeen in sy eie gemoed ten volle oortuig wees. 6 Hy wat die dag waarneem, neem dit waar tot eer van die Meester; en hy wat die dag nie waarneem nie, neem dit nie waar nie tot eer van die Meester; en wie eet, eet tot eer van die Meester, want hy dank Elohiem; en wie nie eet nie, eet nie tot eer van die Meester, en hy dank Elohiem.¹ 7 Want niemand van ons leef vir homself nie en niemand sterf vir homself nie. 8 Want as ons lewe, leef ons tot eer van die Meester; en as ons sterf, sterf ons tot eer van die Meester; of ons dan lewe en of ons sterf, ons behoort aan die Meester. 9 Want hiervoor het die Messias gesterf en weer lewend geword, om oor dode sowel as lewende te heers. 10 Maar jy, waarom oordeel jy jou broer? Of jy ook, waarom verag jy jou broer? Want ons sal almal voor die regterstoel van Elohiem

gestel word. 11 Want daar is geskryf: So waaragtig as Ek leef, sê Yahweh, voor My sal elke knie buig, en elke tong sal Elohiem bely.² 12 So sal elkeen van ons dan vir homself aan Elohiem rekenskap gee. 13 Laat ons dan mekaar nie meer oordeel nie, maar besluit dit liewer, om nie die broer 'n hindernis of struikelblok in die weg te lê nie. 14 Ek weet en is oortuig in die Meester Yahshua dat niks op sigself onrein is nie, maar hy wat reken dat iets onrein is, vir hom is dit onrein. 15 Maar as jou broer deur voedsel gegrief word, dan wandel jy nie meer volgens die liefde nie. Moenie deur jou voedsel hom te gronde rig vir wie die Messias gesterf het nie. 16 Laat dan van die goeie wat aan julle behoort, nie kwaad gepraat word nie. 17 Want die koninkryk van Elohiem is nie voedsel en drank nie, maar geregtigheid en vrede en blydskap in die Afgesonderde Gees. 18 Want hy wat die Messias hierin dien, is aan Elohiem welgevallig en by die mense geag. 19 Laat ons dan najaag wat tot vrede en onderlinge stigting dien. 20 Moenie ter wille van voedsel die werk van Elohiem afbreek nie. Alles is wel rein, maar dit is verkeerd vir 'n mens om te eet as dit tot aanstoot is. 21 Dit is goed om geen vleis te eet of wyn te drink of iets te doen waardeur jou broer aanstoot neem of struikel, of waarin hy swak is nie. 22 Het jy geloof? Behou dit vir jousef voor die aangesig van Elohiem. Geseënd is hy wat homself nie oordeel in wat hy vir geoorloof ag nie. 23 Maar hy wat twyfel as hy eet, is veroordeel, omdat dit nie uit die geloof is nie; en alles wat nie uit die geloof is nie, is sonde.

Romeine 15:1 En op ons wat sterk is, rus die verpligting om die swakhede te dra van die wat nie sterk is nie, en nie onself te behaag nie. 2 Want elkeen van ons moet die naaste behaag met die oog op wat goed is tot stigting. 3 Want ook die Messias het Homself nie behaag nie, maar soos geskryf is: Die smaadhede van die wat U smaad, het op My geval.³ 4 Want alles wat tevore geskryf is, is tot ons lering tevore geskryf, sodat ons deur lydsaamheid en bemoediging

¹ 14:5-6 In die lig daarvan dat hierdie hele hoofstuk oor gebruike handel wat met **voedsel** te make het, is die "dag" en "dae" waarvan hierdie twee verse praat, waarskynlik 'n verwysing na die "dag" of "dae" van die week waarop verskillende godsdienstige groepe gemeen het dat daar **gevas** behoort te word. Die Yehudiem het in hierdie tyd die gebruik gehad om twee spesifieke dae van die week as "vasdae" uit te sonder.

² 14:11 Vgl. YeshaYahu 45:23

³ 15:3 Vgl. Tehielliem 69:9